

08/11/1998

Temu duga tunjuk sebab bermula Rabu

Halmi Samad

KUALA LUMPUR: Proses menemu duga 25 ahli Umno yang diberi surat tunjuk sebab akan bermula Rabu ini dan ia dilakukan secara berperingkat bagi membolehkan mereka memberi penjelasan terbaik.

Ia selaras dengan pendirian Majlis Tertinggi (MT) tidak mahu sewenang-wenangnya menyingkir ahli terbabit dan kerana itu, mereka diberi masa menerang pendirian sebenar.

Setiausaha Agung Umno, Datuk Seri Sabbaruddin Chik, berkata Jawatankuasa Pengurusan dan Disiplin yang bakal menemu duga mereka juga pasti tidak mampu merumus keputusan terbaik kalau terburu-buru.

"Mereka akan berpeluang bela diri. Kita juga tidak terburu-buru. Kerana itu, kita temu duga seorang demi seorang. Kalau tidak sempat Rabu ini, sambung minggu depan."

"Pendek kata, Umno tidak sewenang-wenangnya akan membuang mereka. Umno pun bukan suka buang ahli macam itu saja," katanya ketika mengulas tindakan MT memutus menemuduga 25 ahli yang menerima surat tunjuk sebab.

Sabbaruddin yang juga Menteri Kebudayaan, Kesenian dan Pelancongan berkata hampir semua ahli yang ditahan mengikut Akta Keselamatan Dalam Negeri (ISA) akan diarah berbuat demikian.

MT yang dipengerusikan presiden Umno, Datuk Seri Dr Mahathir memutus mendapat penjelasan lanjut daripada 25 ahli Umno, termasuk bekas Ketua Pemuda, Datuk Ahmad Zahid Hamidi, yang didakwa terbabit dalam gerakan antikerajaan dan parti.

Selain itu, pergerakan mereka juga akan terus diawasi. Lapan lagi ahli yang terbabit mendakwa mereka belum lagi mendapat surat tunjuk sebab daripada ibu pejabat parti.

Beliau berkata, Jawatankuasa Pengurusan dan Disiplin akan mengemuka cadangan kepada MT untuk keputusan mutlak.

Katanya, ada empat alternatif boleh diambil MT ke atas semua ahli berkenaan iaitu digantung keahlian, diberi amaran keras, tidak dibenar bertanding dan disingkir daripada parti.

Kepada satu soalan, katanya, tindakan MT itu bertujuan mengingatkan semua ahli Umno supaya sentiasa menjaga tatasusila dan disiplin parti dalam sebarang keadaan.

Terdahulu, dalam ucapannya ketika merasmi Hari Q Lembaga Penggalakan Pelancongan Malaysia (LPPM) di sini, Sabbaruddin menasihati semua kakitangan lembaga itu tidak membabit diri dalam kegiatan reformasi.

Beliau kemudian menyampai sijil penghargaan kepada 86 pekerja yang menerima anugerah khidmat lama, pergerakan gaji melintang (sembilan), menegak (13) dan pekerja kontrak (tiga).

(END)